

# Бичкдүдт тааста кино үзүлхмн

Амрдг өдрт мана балгъсна бичкдүд кинод одна. Терүндән теди өрүн артас авн белдвр кенә. Тер кинод, ик зуудан, школд орад уга, 5—6 наста бичкдүд болн эклц классмудин сургъульчнр одцхана. Кестнъ эгчнрән, ахнран дахад одна. Зәрмнъ «эврәннъ аргъар» одцхана. Теднд киногъас онъгдан сергдж, амрдг газр мана балгъснд уга. Кино эклхас өмн теди кинотеатрин өөр хурцхана.

Кинотеатрин үүдн секгднә. Бичкдүд түлкдәд, дарцлдад орцхана. Эк-эцкнрәснъ болн пионерск организацсас, школас болн комсомольск организацсас тенд нөкд болсн күн үзгдхш. Болв би эн тодлвртан тер бичкдүдин «зовлнъгин» үнинъ икдүлдж, умшачин онъгиг терүнүр залхар бәәхшв.

Кедү дарцлддг, үүмлддг болв чигн, үзсн кинонъ тааста болхла, теди тер тоот үүмәгъән мартад, байрта-шуугата хәрцхәнә: ю үзсән, ягъдж медсән, юн таасгдсинъ хоорндан селвлцәд күүнднә. Тер учрар, бичкн улст таасмджта, теднә бичкн ухана чидләр, утхарн амр, сергмджтә кино зург бичкдүдт үзүлх төр—кинопрокатин Хальмг конторин эркн төр мөн.

Одахн, нег воскресенъд, бичкдүд седкләрн харгъсн, сергмджтә болсн деерән, сургъулиннъ медвр өөдлүлгънд дөнъ болгч кино хәләцхәв. Эн кинон нернъ—«Тропою джунглей». Иим кино эдн кест цагас нааран үзәд уга билә. Эн кинод Китдин зоопаркд бәәх болн китдин агъу ик газрин ө-шугъу модар, өвснхулсн дотрагъар бәәдг зерлг кест олт зүсн агърусд, анъгуд болн шовуд үзүлнә. Эдниг бичкдүд икәр сонъмсдж, өврдж, онъган өгч хәләцхәв. Юнъгад гихлә, теди эн агърусдиг, анъгудиг, шовудиг зургар медхас биш, амд бийинъ үзәд уга. Кинод теди амд метәр үзгднә.

Мана агъу ик Төрскнә агърусдин, шовудин болн ургъмлин тускар, көгджмин, би, дуутъин тускар болн туульар бүрдәсн олт зүсн кинозургуд бәәнә. Тедниг бичкдүдт үзүлдж болхмн, үзүлх кергтә.

Бичкдүдиг күндләд, теднә неквринъ тевчәд, теднд сергмджтә сән амрлгъ теткхмн. Мана балгъсна комсомольск болн пионерск организацс, школмуд болн эк-эцкнрнъ бичкдүдиг сергмджтәгъәр амрлгънд онъган өгч терүнд икәр орлцх зөвтә.

Г. УБУШИЕВ.